

DOMENIE XXI «VIE PAL AN»

Antifone di jentrade cf. Sal 85,1-3

Slungje la tô orele, Signôr, e rispuindimi:
gno Diu, salve il to famei che in te al spere;
ve dûl di me, Signôr,
ch'ò ai berlât viers di te dute la zornade.

Colete

Diu, che tu unissis tun sôl volê i cûrs dai tiei fedêi,
daur ai tiei popui di volê ben a ce che tu comandis
e di bramâ ce che tu desideris
par che, framieç dai savoltaments di chest mont,
i nestrîs cûrs a sedin pontâts là ch'e je la vere gjonde.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 22,19-23

I metarai su la spale la clâf de cjase di David.

Dal libri dal profete Isaia
Cussi al dîs il Signôr cuintri di Sebne, sorestant dal palaç:
«Ti pararai vie dal to puest
e ti gjavarai de tô incariche.
In chê di al sucedarà ch'ò clamarei il gno famei
Eliakim, fi di Chelkie.
Lu riviestissarai cu la tô tonie,
lu pearai cu la tô cengle,
e o metarai tes sôs mans il to comant.
Al sarà un pari pe int di Gjerusalem
e pe cjase di Gjude.
I metarai su la spale la clâf de cjase di David;
al vierzarà e nissun nol podarà sierâ;
al sierarà e nissun nol podarà vierzi.
Lu pontarai tant che un claut tun puest sigûr,
e al sarà une sente di glorie pe cjase di so pari».
Peraule di Diu.

SALM RESPONSORIÂL dal Salm 137

R. Pal to boncûr, Signôr, no sta lassâmi impastanât.
Ti ai agrât, Signôr, cun dut il cûr,
ti cjantarai a ti denant dai dius.
O vuei butâmi in zenoglon viers dal to santuari. **R.**

Al to non o dîs graziis,
pal to boncûr e pe tô fedeltât:
cuant che ti ai clamât tu âs dade rispueste;
tu i âs dât snait a la mê anime. **R.**

Il Signôr al è plui alt di ogni altri
ma sul piçul a cjalâ si plee,
intant che il supierbeôs di lontan lu lume.
Signôr, il to boncûr al è par simpri:
la vore des tôs mans no sta lassâle impastanade. **R.**

SECONDE LETURE Rm 11,33-36

Dut al ven di lui, al sta sù in fuarce di lui e dut al va viers di lui.

De letare di san Pauli apuestul ai Romans

O profunditât de ricjece, de sapience e de cognossince di Diu! Cetant grivis di capî ch'a son i siei judizis e cetant che si stente a cjatâ fûr lis sôs stradis! "Cui aial mai cognossût il pinsîr dal Signôr? E cui i aial insegnât tant che conseîr? Cui mai i aial dât alc par prin par pratindi che lui jal torni?"

Parcè che dut al ven di lui, al sta sù in fuarce di lui e dut al va viers di lui. A lui la glorie tai secui.

Amen.

Peraule di Diu.

CJANT AL VANZELI Mt 16,18

R. Aleluia, aleluia.

Tu tu sês Pieri e sun cheste pierre

o tirarai sù la mê glesie

e lis puartis des inferis

no rivaran a vêle vinçude cuintri di jê.

R. Aleluia.

VANZELI Mt 16,13-20

Tu tu sês Pieri e a ti ti darai lis clâfs dal ream dai cîi.

Dal vanzeli seont Matieu.

In chê volte, rivât Gjesù te regjon di Cesaree di Filip, al tacà a interpelâ i siei dissepui disint: «La int cui disie ch'al sedi il Fi dal om?». I rispunderin: «Cui al dîs ch'al sedi Zuan il Batiste, cui Elie, cui Gjeremie o un altri dai profetis». Ur disè: «Ma vualtris cui disêso che jo o sedi?». Al cjàpà la peraule Simon Pieri e i disè: «Tu tu sês il Crist, il Fi dal Diu vîf».

I rispundè Gjesù: «Furtunât tu, Simon, fî di Gjone, parcè che ni la cjar ni il sanc no tal an palesât, ma il Pari gno ch'al è tai cîi. Jo ti dîs: Tu tu sês Pieri e sun cheste pierre o tirarai sù la mê glesie e lis puartis des inferis no rivaran a vêle vinçude cuintri di jê. Ti darai lis clâfs dal ream dai cîi; dut ce che tu varâs peât su la tiere al sarâ peât tai cîi, e dut ce che tu varâs dispeât su la tiere al restarâ dispeât tai cîi».

Po ur ordenà ai dissepui di no dî a dinissun che lui al jere il Crist.

Peraule dal Signôr.

Su lis ufiertis

Signôr, che cuntune sole vitime,

ufierte une volte sole,

tu ti sês cuistât un popul di fis,

danus, inte tô Glesie, la gracie de unitât e de pâs.

Par Crist nestri Signôr.

Antifone a la comunion cf. Sal 103,13-15

Cul prodot des tôs voris tu passis la tiere, Signôr,
par tirâ fûr il pan de tiere e il vin ch'al indalegri il cûr dal om.

O ben: Zn 6,54

Chel ch'al mangje la mê cjar e al bêt il gno sanc

al à la vite eterne, al dîs il Signôr,

e jo lu resussitarai te ultime dì.

Daspò de comunion

La midisine dal to boncûr, Signôr,

ch'e operi adimplen dentri di nô

e judinus e refinissinus
in mût di fâti content in ogni nestre vore.
Par Crist nestri Signôr.